

## 每週經課朗誦經文(巴克禮漢羅/教羅)2014/07/13

### 共同經課 - 1

#### 創世記二十五章十九節~三十四節

19 亞伯拉罕 ê kiáⁿ 以撒 ê 世系,記 tī 下底:亞伯拉罕生以撒;20 以撒娶利百加做 bó ê 時,tú-á 四十歲。伊是 Pa-tàn-a-lân 地 ê A-lân 人 Pi-thó-lī ê cha-bó-kiáⁿ, A-lân 人拉班 ê 小妹。21 以撒因為伊 ê bó 無生 kiáⁿ, 替伊祈求耶和華;耶和華允准伊所求;伊 ê bó 利百加就懷孕。22 Gín-á tī 伊 ê 腹內相 khoeh;伊就講,若是 chit 款,我 mih-sái án-ni? 就去問耶和華。23 耶和華 kā 伊講,兩國 tī 你腹內,兩族 beh 對你 ê 身軀出;chit 族 beh khah 強 hit 族;序大 ê beh 服事序細 ê。24 生產 ê 日期到,果然腹內是雙生 ê。25 頭一個出來 ê,身體紅紅,thong 身軀親像皮 á 衫;就 kā 伊號名做以掃。26 tè 後伊 ê 小弟 koh 出來,伊 ê 手擒以掃 ê 腳後 tī;就 kā 伊號名叫雅各。兩個 kiáⁿ 出世 ê 時,以撒 tú-á 六十歲。27 兩個 gín-á 漸漸大;以掃 gâu phah 獵,常常 tī 山野;雅各做人恬靜,常常 toà 布棚內。28 以撒疼以掃,因為常常食伊 ê 野味。利百加疼雅各。29 有一日雅各煮湯,以掃 tùi 山野 tò 來,厭倦到極。30 以掃對雅各講,我真厭倦,求你用 chit-ê 紅 ê 湯 hō 我食;因為 án-ni 以掃亦名叫以東。31 雅各講,你今 á 日用大 kiáⁿ ê 名份賣 hō 我。32 以掃講,我 to beh 死 lah;chit-ê 大 kiáⁿ ê 名份,對 tī 我有啥利益?33 雅各講,今 á 日你 tiòh 對我 chiù-choā。伊就對伊 chiù-choā,將大 kiáⁿ ê 名份賣 hō 雅各。34 雅各就將餅 kap 紅豆湯 hō 以掃;伊就 lim 食,起來做伊去;這就是以掃看輕大 kiáⁿ ê 名份。

### 共同經課 - 2

#### 詩篇一百一十九篇一百零五節~一百一十二節

105 你 ê 話做我腳前 ê 燈, 做我路上 ê 光。106 你公義 ê 判斷,我 bat chiù-choā beh 遵守; 我決斷 án-ni 行。107 我受苦到極; 耶和華 ah, 求你照你 ê 話 hō 我活。108 耶和華 ah, 求你監納我 ê 嘴所歡喜獻 ê o-ló, Koh 將你 ê 判詞教示我。109 我 ê 性命常常 tú-tiòh 危險; láu-kú 我無 boē 記得你 ê 律法。110 Pháiⁿ 人設羅網 beh 害我; 總是我無偏離你 ê 教示。111 我將你干證 ê 話,做永遠 ê 基業; 因為這是我心內所歡喜 ê。112 我 hō 我 ê 心專 ng 你 ê 律例; 永遠遵 thàn, 直到路尾。

#### or 詩篇二十五篇

1 大衛 ê 詩。1) 耶和華 ah, 我 ê 心神仰望你。2 我 ê 上帝 ah, 我平素 oá 靠你, m̄-thang hō 我見笑。M̄-thang hō 我 ê 對敵因為贏我來誇口。3 見若 thèng 候你 ê, 的確無見笑; Hiah-ê 無緣故行奸詐 ê, beh 見笑。4 耶和華 ah, 求你將你 ê 道路指示我, 將你 ê 路途教示我。5 求你 chhoā 我 tī 你 ê 真理, koh 教示我; 因為你是救我 ê 上帝。我 thong 日 thèng 候你。6 耶和華 ah, 求你記念你 ê 憐憫 kap 你 ê 慈愛; 因為這是古早以來常常有 ê。7 求你 m̄-thang 記念我少年 ê 罪過, kap 我 ê 過失; 耶和華 ah, 求你照你 ê 慈愛, 因為你 ê 恩惠記念我。8 耶和華是好 koh 正直; 所以伊 beh 指示罪人行正路。9 伊 beh 用公平引 chhoā 謙遜 ê 人, 伊 beh 用伊 ê 道路教示謙遜 ê 人。10 見若守伊 ê 約, kap 伊 ê 干證 ê 人, 耶和華款待 in lóng 是用慈愛誠實。11 耶和華 ah, 我 ê 罪真重; 求你因為你 ê 名赦免我。12 甚麼人敬畏耶和華? 耶和華 beh 指示伊所 tiòh 揀 ê 路。13 伊 ê 心神 beh 得 tiòh 安歇; 伊 ê 後裔 beh 承接土地。14 耶和華 kap 敬畏祂 ê 人親密; Koh beh 將祂 ê 約指示 in。15 我 ê 目睭常常 ng 耶和華; 因為伊 beh hō 我 ê 腳脫離羅網。16 求你 oát-tng ng 我, 可憐我; 因為我是孤單 koh 困苦。17 我 ê 心內 ê 憂苦真 choē, 求你救我脫離 tī 我 lóng 總 ê 患難。18 求你看我 ê 艱難 kap 我 ê 勞苦; 赦免我一切 ê 罪。19 求你看我 ê 對敵, 因為 in 真 choē; In 怨恨我真惡毒。20 求你保護我 ê 性命, 拯救我; Hō 我無見笑, 因為我 oá 靠你。21 願純全正直保護我, 因為我 thèng 候你。22 上帝 ah, 求你救贖以色列, 脫離伊一切 ê 艱苦。

### 共同經課 - 3

#### 羅馬書八章一節~十一節

1 所以 hiah-ê tiàm-tī 基督耶穌 ê, taⁿ lóng 無定罪。2 因為活命 ê 神 ê 法, tī 基督耶穌已經 tháu 放我脫離罪 kap 死 ê 法。3 因為律法所 boē 會 ê, 是 tùi 肉體 chiah 無力, 上帝就差家己 ê Kiáⁿ, tī 有罪 ê 肉體 ê 形狀, koh 為 tiòh 罪 ê 緣故, tī 肉體中來擬定罪惡; 4 hō 律法 ê 義 tī 咱會得滿足, 就是無照肉體, 是照神來行 ê。5 因為照肉體 ê, 意向肉體 ê 事; 照神 ê, 意向神 ê 事。6 因為肉體 ê 意向是死; 神 ê 意向是活 koh 平安。7 因為肉體 ê 意向是對敵上帝, 因為伊無降服上帝 ê 律法, 也 boē 會降服。8 Koh tiàm-tī 肉體 ê, boē 會 hō 上帝歡喜。9 獨獨上帝 ê 神若 khiā 起 tī lín, 就 lín 無 tiàm-tī 肉體, 是 tiàm-tī 神; 無有基督 ê 神 ê, m̄ 是伊 ê 人。10 基督若 tiàm-tī lín, 就 lín ê 身軀因為罪死, 神因為義活。11 獨獨 hō 耶穌 tùi 死人中 koh 活 ê, 伊 ê 神若 khiā 起 tī lín, 就 hō 基督耶穌 tùi 死人中 koh 活 ê, 也 beh 將伊 ê 神, 就是 khiā 起 tī lín ê, hō lín 會死 ê 身軀 koh 活。

### 共同經課 - 4

#### 馬太福音十三章一節~九節, 十八節~二十三節

1 當 hit 日, 耶穌 tùi 厝內出去, 坐 tī 海邊。2 有 choē-choē 陣 ê 人聚集就近伊, 致到伊上船來坐, kui 陣 ê 人 lóng khiā tī 岸裡。3 就用 choē-choē 項設譬喻 kā in 講, 4 你看, 有掖(iā)種 ê 出去掖種; 掖 ê 時, 有 ê ka-láuh tī 路邊, 飛鳥到, 一盡食伊; 5 有 ê ka-láuh tī 石格 ê 地, 土淺 ê 位; 因為土無深, 就發真緊; 6 若是日出曝伊; 因為無根, 就枯焦。7 亦有 ê ka-láuh tī 刺 á 內, 刺 á 發起遮蔽伊; 8 有 ê ka-láuh tī 好 ê 土地, 結實, 有 ê 百倍, 有 ê 六十倍, 有 ê 三十倍。9 有耳孔 ê, tiòh 聽。18 Taⁿ chit-ê 掖種子 ê 譬喻, lín tiòh 聽。19 見若聽天國 ê 道理也無曉悟 ê, hit-ê pháíⁿ-ê 就到, 將所掖 tī 伊 ê 心 ê 搶去; 這是掖 tī 路邊 ê。20 掖 tī 石格 ê 地 ê, 這是人聽道理, liām-piⁿ 歡喜承受伊; 21 總是內面無根, 不過是暫時 nā-tiāⁿ; 到為 tiòh 道理 tú-tiòh 有患難 khún-tiók liām-piⁿ tiòh-tak。22 掖 tī 刺 á 內 ê, 這是人聽道理, 亦世間 ê 掛慮, 錢財 ê 迷惑, 遮蔽 hit-ê 道理, 就無結實。23 掖 tī 好土地 ê, 這是人聽道理來曉悟, 伊實在結實; 所結 ê, 有 ê 百倍, 有 ê 六十倍, 有 ê 三十倍。